

CONVENIO DE COLABORACIÓN ENTRE A CONSELLERÍA DE POLÍTICA SOCIAL E XUVENTUDE E A FUNDACIÓN DE ADULTOS DISCAPACITADOS DE A CORUÑA (ADCOR), PARA O FINANCIAMENTO DOS GASTOS DERIVADOS DA EXECUCIÓN DO PROGRAMA DE TERAPIA, REHABILITACIÓN, LECER E GOCE PERSOAL E DO PROGRAMA DAS TECNOLOXÍAS DA INFORMACIÓN E DA COMUNICACIÓN DESTINADOS ÁS PERSOAS CON DISCAPACIDADE NO EXERCICIO 2023

MEMORIA XUSTIFICATIVA

A Comunidade Autónoma de Galicia, segundo o establecido no artigo 27.23 do Estatuto de autonomía de Galicia, en consonancia coa habilitación competencial outorgada ás comunidades autónomas polo artigo 148.1.20 da Constitución española, ten competencia exclusiva en materia de asistencia social polo que, na súa virtude, se aprobou a Lei 13/2008, do 3 de decembro, de servizos sociais de Galicia.

A Consellería de Política Social e Xuventude é o órgano superior da administración autonómica ao que lle corresponde as competencias en materia de benestar social, e consecuentemente a atención do colectivo de persoas con discapacidade, conforme ao Decreto 124/2022, do 23 de xuño, polo que se establece a estrutura orgánica da Consellería de Política Social e Xuventude.

A Fundación de Adultos Discapacitados de A Coruña (ADCOR) foi clasificada como benéfico - asistencial por Orde do 13 de marzo de 1996, da Consellería da Presidencia e Administración Pública, e declarada de interese galego por Orde do 25 de abril de 1996, da Consellería de Sanidade e Servizos Sociais, e inscrita no rexistro de fundacións de interese galego co número 1996/3.

Actualmente, a fundación está baixo o protectorado da agora Consellería de Política Social e Xuventude en virtude da Orde do 2 de febreiro de 2016 pola que se modifica a adscrición de determinadas fundacións de interese galego e se ordena a súa adscrición ás consellerías competentes para o exercicio das funcións de protectorado.

A fundación ten por finalidade a articulación de medidas asistenciais, prelaborais, laborais e formativas, dirixidas a persoas adultas en situación de discapacidade, tal como se recolle nos seus estatutos.

Así mesmo, a Fundación de Adultos Discapacitados de A Coruña (ADCOR) figura inscrita no Rexistro de Entidades Prestadoras de Servizos Sociais co número E-0920.

Actualmente faise preciso establecer medidas orientadas á prevención da situación de dependencia e promoción da autonomía persoal das persoas adultas en situación de dependencia, e as súas familias, mediante unha atención integral personalizada.

A Fundación de Adultos Discapacitados de A Coruña (ADCOR) leva a cabo unhas actuacións no marco dos programas de promoción da autonomía persoal e de prevención e atención á dependencia, dirixidas a persoas adultas con discapacidade nas áreas de estimulación cognitiva, física, funcional e sensorial, e actividades recreativas e de lecer.

Conforme ao exposto, é do interese da Consellería de Política Social e Xuventude subscribir un convenio de colaboración coa Fundación de Adultos Discapacitados de A Coruña (ADCOR) para a concesión dunha subvención directa destinada ao financiamento



dos gastos derivados do Programa de terapia, rehabilitación, lecer e goce persoal que se desenvolve nas áreas de estimulación cognitiva, estimulación física, estimulación funcional, estimulación sensorial e área de actividades recreativas e de lecer, e do Programa das tecnoloxías da información e da comunicación, cos que se persegue un aumento da calidade de vida da persoa residente a través de programas de carácter preventivo e rehabilitador.

O obxecto do presente convenio é a concesión directa dunha subvención para o financiamento dos gastos derivados da execución das actuacións que forman parte do Programa de terapia, rehabilitación, lecer e goce persoal (que se desenvolve nas áreas de estimulación cognitiva, estimulación física, estimulación funcional, estimulación sensorial e área de actividades recreativas e de lecer) e Programa das tecnoloxías da información e da comunicación (Tic's), no exercicio 2023.

Perséguese o aumento da calidade de vida da persoa residente a través de programas de carácter preventivo e rehabilitador, e ofrecer un tempo e espazo no que se poidan xerar situacións de convivencia e participación a través de actividades recreativas.

Para a realización das actividades realizarase unha avaliación previa da capacidade funcional de cada persoa participante das actuacións dos programas.

As actividades subvencionadas son as seguintes:

1. Programa de terapia, rehabilitación, lecer e goce persoal. Co obxecto de prestar atención ao colectivo das persoas con discapacidade desenvólvense unhas actuacións nas áreas que se relacionan:

a) Área de estimulación cognitiva.

Son un conxunto de actividades que teñen como obxectivo activar, estimular e adestrar as distintas capacidades e funcións cognitivas como a percepción, atención, razoamento, abstracción, memoria, linguaxe, procesos de orientación e praxe. Todos o días realízanse actividades de orientación á realidade así como actividades de reminiscencia.

b) Área de estimulación física.

Realízase a través de xeronto-ximnasia, psicomotricidade e deambulación. A xeronto-ximnasia consiste na mobilización activa e voluntaria das distintas partes do corpo. No caso das persoas con maior deterioro a xeronto-ximnasia é de forma pasiva e individual.

As actividades de deambulación desenvólvense diariamente co obxectivo de manter a capacidade da marcha e está dirixido ás persoas residentes que, aínda mantendo á súa capacidade de marcha non poden facelo sen axuda.

c) A actividade de psicomotricidade permite traballar de forma global os aspectos físicos, cognitivos e afectivos a través da realización de rutinas de exercicios con diferentes obxectos. Área de estimulación funcional.

Formación na execución das diferentes actividades básicas da vida diaria, e actividades manuais que sirvan para potenciar as diferentes capacidades e habilidades das persoas residentes e favorecer así a súa independencia e autonomía na vida cotiá.

d) Área de estimulación sensorial.



e) Son sesións nas que se traballan as sensacións utilizando diferentes materiais como sons, luces, texturas e temperatura, para proporcionar a maior estimulación posible Área de actividades recreativas e de lecer.

Teñen lugar todos os días da semana en horario de tarde, procurando que se beneficien delas o máximo posible de residentes. Realízanse as seguintes actividades: xogos de mesa, pintura, actividades musicais, visionado de películas, e saídas organizadas.

2. Programa TIC'S.

Este programa ten como fin principal mellorar e potenciar o uso das das novas tecnoloxías da información e a comunicación nas persoas usuarias, que se concreta nas seguintes actividades:

- a) Obradoiros de alfabetización dixital
- b) Aplicación do programa HAPS (Habilidades Adaptativas)
- c) Obradoiros de manexo de tabletas
- d) Obradoiros de utilización de redes sociais (facebook, twitter...)
- e) Obradoiros de uso de internet

Para o cumprimento da finalidade prevista na cláusula primeira deste convenio a Consellería de Política Social e Xuventude achegará **sesenta e un mil trescentos quince euros (61.315,00€)** que serán imputados á aplicación orzamentaria 13.04.312E.481.1 dos orzamentos xerais da Comunidade Autónoma de Galicia para o ano 2023. Dita cantidade destinarase a gastos de persoal e gastos correntes necesarios para o desenvolvemento das actividades contempladas no convenio. Este financiamento terá vixencia desde o momento da sinatura do convenio ata o 31 de decembro de 2023, con efectos económicos desde o 1 de xaneiro de 2023.

Conforme aos requisitos previstos no artigo 19.4 c) da Lei 9/2007, do 13 de xuño, de subvencións de Galicia, e no 36 c) do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, a Fundación de Adultos Discapacitados de A Coruña (ADCOR) é unha organización sen ánimo de lucro, que desenvolve no ámbito da Comunidade Autónoma galega programas para a mellora da calidade de vida das persoas con discapacidade e as súas familias, dispoñendo da experiencia, capital humano e medios axeitados para desenvolver esa atención.

Tendo en consideración as características das persoas usuarias do centro e para a mellora da calidade de vida das mesmas, lévase a cabo unha programación de carácter preventivo e rehabilitador .

A Fundación de Adultos Discapacitados de A Coruña (ADCOR) é a única entidade que conta cos recursos para atender a este colectivo de persoas, polo que o interese público e social desta concesión directa queda acreditada pola atención a este colectivo vulnerable, o que dificulta a súa convocatoria pública. As razóns de interese público, social e humanitario neste caso, no que o interese prioritario é o mantemento das persoas usuarias no centro, xa que o centro constitúe unha auténtica referencia vital para as persoas con discapacidade residentes nel, chegando a ser un verdadeiro fogar, polo que debe



asegurarse a estabilidade e continuidade dos servizos. Esta excepcionalidade ao réxime de concorrencia competitiva establécese igualmente no artigo 31 da Lei 13/2008 do 3 de decembro.

Que conforme aos requisitos previstos no artigo 26.2. apartado a) da Lei 9/2007, do 13 de xuño, de subvencións de Galicia, e no artigo 40 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, a especificidade as actuacións que desenvolve a Fundación de Adultos Discapacitados de A Coruña (ADCOR) vén determinada pola exclusividade do proxecto, deseñado en función das características das persoas usuarias do centro, e ten como finalidade proporcionar a habilitación profesional, persoal e social, para conseguir o máximo desenvolvemento das capacidades persoais e laborais das persoas adultas con discapacidade intelectual posibilitando a integración social.

Tendo en conta por unha banda a especificidade do programa polas características da actividade que se vai financiar, o colectivo ao que van dirixidas, e a ausencia no ámbito territorial de aplicación de entidades alternativas que dispoñan da infraestrutura material e medios humanos esixibles; e por outra a súa adecuación ao ámbito competencial da Consellería de Política Social e Xuventude, conforme ao previsto no Decreto 124/2022, do 23 de xuño, polo que se establece a súa estrutura orgánica, en tanto que se trata de persoas con discapacidade, e as específicas necesidades inherentes ao colectivo ao que van dirixidas, considéranse razóns que acreditan o seu interese social, quedando xustificada a imposibilidade de promover a concorrencia pública en aplicación da Lei 6/2022, do 27 de decembro, de orzamentos xerais da Comunidade Autónoma de Galicia para o ano 2023, en relación do artigo 19.4 da Lei 9/2007, do 13 de xuño, e ao Decreto 11/2009, do 8 de xaneiro.

Asinado dixitalmente en Santiago de Compostela

O director xeral de Persoas con Discapacidade

Fernando González Abeijón

